

四庫全書

經部

欽定四庫全書

禹貢會箋卷八

翰林院檢討徐文靖撰

華陽黑水惟梁州

蔡傳曰東距華山之南西據黑水華山即太華見導

山黑水見導水

箋

按孔傳東據華山之南西距黑水

蔡氏曰雍梁二州皆西據黑水以黑水之見于導水者至于三危入于南海總發于雍西經于梁西故不

應言西距黑水也穆天子傳天子至于重鎰氏黑水之  
阿爰有采石之山晉書地道記梁州南至桓水西底  
黑水東限捍闕山海經黑水出張掖雞山南流至燉  
煌過三危而南流入于南海是黑水綿歷二州西界  
蔡易西距為西據是也

岷嶓既藝

史記作  
汶嶓

蔡傳曰岷山地志在蜀郡湔氐道西徼外在今茂州  
汶山縣江水所出也箋按郝京山曰岷山在今成都

府茂州江水所經也江源出今松潘衛西二百三十里大分水嶺北流入陝西洮河南流入甘松嶺經松潘城而岷山又在城東三十里自分水嶺至成都凡九百九十里水尚小自成都東流千五百里至瀘州以東馬湖嘉陵江涪江巴江等水合而江始大

蔡傳曰嶓冢在隴西氐道漾水所出又云在西縣今興元府西縣三泉縣也

箋

按孔傳曰漾水出嶓冢在

梁州正義曰梁州云嶓冢既藝是嶓冢在梁州也唐

六典山南道名山曰嶓冢嶓冢縣故城在今漢中府  
沔縣南四十里西南接寧羌州界嶓冢山在州北九  
十里既藝言水土既平樹藝五穀也唐志興元府有  
西縣三泉縣武德三年以西縣置褒州尋廢四年析  
利州之綿谷縣置三泉縣又以縣置南安州尋廢宋  
志有西縣無三泉縣元又省西縣入略陽也

沱潛既道

史作沱潛  
漢沱滿

蔡傳曰江漢別流之在梁州者地志禹貢江沱在蜀

郡郫縣西東入大江又地志汶江縣江沱在西南東  
入江今永康軍導江縣也箋按爾雅郭氏音義曰沱  
水出蜀郡都水縣湔山與江別而更流所謂水出自  
江為沱也徐士彰曰江漢二水源出梁州夾蜀山而  
行江在山之南漢在山之北自梁至荆山行數千里  
凡山南谿谷之水皆自江而出山北谿谷之水皆自  
漢而出其水衆多不足盡錄故南總為沱北總為潛  
蓋當時之方言猶今言谿谷云爾後之讀爾雅者誤

以江漢為沱潛所出之源不知其為沱潛所出之路也禹貢言岷山導江東別為沱沱猶它也蓋江之發源在岷山極西處自江源而東凡別水之來會者皆為此江之沱不得自為一水也今蜀江沿岸溪水合處猶有鑑沱勾流沱明月沱歸鄉沱之名尚可想見當時命名之意云

蔡傳曰地志巴郡宕渠縣潛水西南入江今渠州流江縣也酈道元謂宕渠有大穴潛水入焉道岡山下

西南潛出南入于江又地志漢中郡安陽縣瀟谷水

出西南入漢

瀟音潛

今洋州真符縣也

箋

按爾雅郭氏

音義曰有水從漢中沔陽南流至梓潼漢壽入大穴

中通岡山下西南潛出又蜀都賦注潛水從犍為郡

江陽縣

今叙州府富順縣

南流至漢嘉縣

漢嘉疑漢壽之譌

入大穴

中通岡山下西南潛出今名復出水是大穴在漢壽

不在宕渠也蔡傳引酈注謂宕渠有大穴疑誤漢壽

晉改為晉壽庾仲雍曰墊江有別江出晉壽縣即潛

水也其南源取巴西是西漢水也足證漢嘉之誤

蔡蒙旅平

蔡傳曰蔡山輿地記在今雅州嚴道縣蒙山地志蜀郡

青衣縣今雅州名山縣也

箋

按鄭氏曰地理志蔡蒙

在漢嘉縣應劭曰蔡山不知所在史記索隱曰蒙在

蜀郡青衣縣青衣後改為漢嘉蔡山不知所在也寰

宇記周公山在嚴道縣東南山勢屹然上有龍穴輿

地記所謂蔡山蓋周公山果若是則自漢迄唐何謂

不知所在也漢地志禹貢蒙山谿在蜀郡青衣縣東

應劭曰順帝改漢嘉縣

今蒙山在雅州名山縣西十五里即禹

貢之蒙山也水經注沫水出岷山西東流過漢嘉南  
流衝一高山山即蒙山也是矣旅平旅當訓序燕禮  
士旅酌鄭注曰士以次序自酌此蔡蒙以次序而就  
故謂之旅平也孔傳曰旅平言治功畢明一統志曰  
有地名旅平在雅州東十里是殆附會之言也

和夷底績

蔡傳曰和夷地名嚴道以西有和川有夷道或其地也又按晁氏曰和夷二水名和水今雅州滎經縣北和川水自蠻界羅岳州東西來逕蒙山所謂青衣水而入岷江者也夷水出巴郡魚復縣東南過佷山縣南又東過夷道縣北東入于江今詳二說皆未可必箋按和夷陸氏釋文曰鄭云和讀曰洹今說禹貢者皆不知有此音唐志雅州廬山郡有和川城今天全司南古和川地現有和水在雅州之西滎經之北蔡傳

以嚴道西之和川為地榮經北之和川為水其實一  
水也唐于和川上立城禹時蓋未有也劉昫曰眉州  
青神縣臨青衣羌青衣水出廬山徼外晁氏以為即  
和水非也地理志夷水出南郡巫縣東過夷道入江  
後漢書廩君乃乘土船從夷水至鹽陽則夷亦水名  
也或曰和夷謂和川上之夷也果若為和川之夷何  
以云底績乎底績者前此績用弗成至是乃能致績  
也

厥土青黎

蔡傳曰黎黑也

箋

按孔傳曰色青黑而沃壤李尤七

嘆曰梁土青黎盧橘是生亦因禹貢而云蔡傳訓黎  
為黑如兗土黑墳向使黎專訓黑何不竟言青黑乎  
馬融王肅訓黎為小疎董氏酉曰考黎無疏訓大抵  
黎當為蒼黑色如今人言蒼黎者是也

厥田惟下上厥賦下中三錯

孔氏曰田第七賦第八雜出第七第九三等

箋

按日記

曰梁田下上似優於揚然多山而少田人功亦劣故賦之等退在下中而又以七九二等為之上下間出調劑可謂密矣無錯者其等已定有錯者其等難定時進退以通節之也

蔡傳曰按賦雜出他等者或以為歲有豐凶或以為戶有增減皆非也意者地力有上下年分不同如周官田一易再易之類故賦之等第亦有上下年分箋按龍子之言曰貢校數歲之中以為常豐歲粒米狼

戾多取之而不為虐則寡取之凶年糞其田而不足則必取盈焉是梁賦下中三錯與冀賦惟上上錯揚賦下上上錯豫賦錯上中雖所錯有不同而要皆調劑斟酌於先制為一定之貢恐無復有上下年分之殊也

厥貢璆鐵銀鏤帑磬

蔡傳曰璆玉磬鐵柔鐵鏤剛鐵可以鏤刻者也磬石磬也箋按爾雅璆琳美玉也孔傳曰璆玉名是也書夏

擊鳴球球與璆同說文璆玉磬是也蔡傳以璆為磬  
据晉語文公問八疾胥臣對曰蘧除蒙璆注云璆是  
玉磬使擊之是也但下有柷磬似應依孔傳為璆玉  
然柷為石磬璆為玉磬自不同也山海經曰少華之  
山其陰多磬石其陽多璆琇之玉故華陽之梁貢璆  
與磬經又曰符禺之山其陽多銅其陰多鐵符禺之  
水出焉北流注于渭故入渭亂河之梁魚貢鐵也又  
傳以鏤為剛鐵亦非爾雅金謂之鏤詩虎韞鏤膺鄭

箋鏤膺有刻金飾也禮雜記管仲鏤簋鄭注刻為蟲獸也明堂位玉琖仍雕夏后氏以琖則雕鏤以為飾可知也彝器款式夏后氏雕戈鈿紫金為文是也若以為剛鐵似當總名為鐵如金三品概名為金也

蔡傳曰言鐵而先於銀者鐵之利多於銀也後世蜀

之卓氏程氏

卓王孫程鄭

以鐵冶富擬封君則梁之利尤

在於鐵也

義

按郡國志巴郡宕渠出鐵蜀郡臨邛有

鐵越雋郡會無出鐵永昌郡不韋出鐵故貢鐵也地

理志朱提縣山出銀句町縣山出銀賁古縣西羊山  
出銀故貢銀也華陽國志登臺有孫水一曰白沙江  
山有柞火燒成鐵故貢柞也凡此皆梁州所產因以  
制貢初何先後之分

熊羆狐狸織皮

蔡傳曰織皮者梁州之地山林為多獸之所走熊羆  
狐狸四獸之皮可以為裘其毳毛織之可以為罽也  
箋按爾雅羆如熊黃白文爾雅翼羆則熊之雌者陶

隱居曰江東無狐皆出北方形似狸而黃詩奕奕梁  
山維禹甸之孔樂韓土有熊有羆獻其貔皮赤豹黃羆  
陸璣疏貔似虎或曰似熊一名白狐遼東人謂之白  
羆陸氏釋文羆如熊而黃又幽風取彼狐狸為公子  
裘小雅大東舟人之子熊羆是裘是四獸之皮製之  
可為裘也周官太宰九貢有幣貢鄭注幣貢玉馬皮  
帛也賈疏曰皮即熊羆狐狸也王制西方曰戎被髮  
衣皮孔傳曰貢四獸之皮織金罽也後漢西域傳織

成金縷罽是也

西傾因桓是來

蔡傳曰西傾山名地志在隴西郡臨洮縣西今洮州

臨潭縣西南

箋

按唐地志洮州臨潭縣西百六十里

有西傾山沙州記洮水出嶂臺山即西郡之異名也

山在今陝西臨洮府西南四百五十里

蔡傳曰桓水名水經曰西傾之南桓水出焉

箋

按沙

州記桓水出嶂臺山南墊江之上源也又一名白水

郭璞曰白水之源從臨洮之西西傾山經沓中

漢金城郡河關

縣西

東流通陰平至漢壽縣

本葭萌劉先主改曰漢壽

入潛是西傾

貢道直與潛通故因桓是來即繼以浮于潛也

浮于潛逾于沔入于渭亂于河

蔡傳曰蘇氏曰漢始出為漾東南流為沔至漢中東行為漢沔酈道元曰自西傾而至葭萌浮于西漢西

漢即潛水也自西漢遡流而屆於晉壽界

本漢壽晉太康中改

阻漾支津南歷岡北迤邐接漢沔歷漢川至于褒水

逾褒而屆于衙嶺之南

衙嶺在今郿縣西南三十里

溪灌于斜屆

于武功而北以入于潛

箋

按水經注南歷岡穴迤邐

而接漢沿此入漾書所謂浮潛而逾沔矣又按爾雅  
疏有水從沔陽流至漢壽縣入大穴中通岡山下西  
南潛出一名沔水則酈注南歷岡穴邢疏通岡山西  
南潛出安得在岡北乎蔡傳岡北乃岡穴之譌酈注  
迤邐而接漢沿此入漾蔡傳迤邐接漢沔當又沿歷  
漢川譌沿為沔矣沔一名沮水出武都沮縣東狼谷

南注至沮口與漾水合漾於是無有汚稱

蔡傳曰漢武帝時人有上書欲通褒斜道及漕事下張湯問之云褒水通沔斜水通渭皆可以漕從南陽上沔入褒褒絕水至斜間百餘里以車轉從斜下渭如此則漢中穀可致箋按梁州記萬石城沂漢上有褒谷南口曰褒北口曰斜長四百五十里此言褒絕水至斜間百餘里蓋褒水出太白山至南鄭入沔斜水出衙嶺山至郿入渭其水道則褒絕水至斜僅間

百餘里也倪氏聚曰漢水不與渭通其相隔處祇隔

一大散關

括地志大散關在岐州陳倉縣東五十里

正棧道處其地陳倉

在東南為褒西為河北為鳳與郿從洋入褒鳳出者

為今連雲棧道漢王之南鄭由之

連雲棧道在今漢中府褒城縣舊有

棧關二千九百八十九間

從郿入從城固洋縣出者為斜谷道武

侯屯渭上由之大散關之水北流為渭南流為漢其

間又有二江白水江入渭黑龍江入漢故梁州貢道

南歷漢沔登陸以車轉北而後乃入於渭也

蔡傳曰經文當曰逾于渭今曰逾于沔未可曉也

箋

按地理志褒水出太白山至南鄭入沔斜水出衙嶺  
山北至郿入渭渭與河通沔不與渭通若逾渭入沔則無  
由亂于河矣蔡傳乃以為當日逾渭何也從渭水漕  
糧東南入河乃雍之水道爾

禹貢會箋卷八

欽定四庫全書

禹貢會箋卷九

翰林院檢討徐文靖撰

黑水西河惟雍州

蔡傳曰西據黑水東距西河謂之西河者主冀都而  
言也箋按孔傳曰西距黑水東據河王肅曰西據黑  
水東距西河蔡傳從王說也河在雍東而曰西河者  
成四百家曰河自積石東北流入雍州在其西故曰

西河穆天子傳乃封長肱于黑水之西河是惟昆侖

鴻鷺之上以為周室主水經黑水出張掖雞山今在

肅州衛城之西北即雍州之黑水也

鳳翔府城西北有雍山黑水出

馬雍州之

名以此

弱水既西

蔡傳曰柳宗元曰西海之山有水焉散渙無力不能

負芥投之則委靡墊沒及底而後止故名曰弱既西

者導之西流也

箋

按山海經陰山北五十里曰勞山

弱水出焉而西流注于洛淮南子曰弱水出窮石地

理志曰張掖刪丹縣桑欽以為導弱水自此至酒泉

合黎通鑑秦征西將軍孔子

胡三省注孔子亦乞伏氏也

討吐谷

渾覓地于弱水南覓地降于秦拜弱水護軍今西寧

衛西三百里有弱水在甘州界蓋即為禹貢之弱水

也鄭氏曰衆水皆東此獨西流據漢書西域傳云于

闐以西水皆西流是禹之導水蓋亦順水之性也括

地志曰弱水有二源俱出女國北阿耨達山

一名建末達山

即崑崙山也

又南歷岡北東去一里深丈餘濶六十步非毛舟不可濟南流入海此柳州所謂不能負芥故名弱水者也且南流入海何從導之西流也以爲即禹貢弱水非矣

### 涇屬渭汭

蔡傳曰涇渭汭三水名涇水地志出安定郡涇陽縣西今原州百泉縣峴頭山也東南至馮翊陽陵縣入渭今永興軍

今西  
安府

高陵縣也

箋

按西山經高山涇水

出焉而東流注于渭易氏曰開頭山一名空同連亘  
原州高平百泉平涼三縣涇水東南流至涇州臨涇  
縣保定縣邠州宜祿縣永壽縣又東北流至京兆醴  
泉縣九擾山東唐志醴泉縣有九  
峻山擾當作峻仲山西當水出山  
處故漢名谷口縣白渠溉田在此又自池陽東今乾  
州  
流至涇陽縣南七里東南流至高陵縣東北流至雲  
陽縣西一十五里即鄭國鑿渠處又東流而入渭洛  
入河處謂之洛汭渭入河處謂之渭汭涇至雲陽縣

而入渭又至華州華陰之永豐倉而入河此二百八

十里間涇與渭相連故云

說文水相入曰汭

蔡傳曰渭水地志出隴西郡首陽縣西南今渭州渭

源縣烏鼠山西北南谷山也東至京兆船司空縣入

河今華州華陰縣也

箋

按水經注渭水出首陽山渭

首亭南谷

句

山在烏鼠山西北渭水三源合注東北

流逕首陽縣西與別源合水出南烏鼠山渭水出谷

此蓋以渭水出首陽山南谷其谷在烏鼠西非別有

南谷山也觀地志云恒水出恒山北谷豈別有北谷山乎山海經涇水出長城北山山在郁郅長垣北北入渭戲北郭璞曰今涇水出安定朝那縣東南至京兆高陵縣入渭戲地名今新豐縣也

蔡傳曰汧水地志作芮扶風汧縣弦蒲藪芮水出其西北東入涇今隴州汧源縣弦蒲藪有汧水焉周職方雍州其川涇汧詩云芮鞠之即皆謂是也案按水經渭水東入于河注曰春秋之渭汧也左傳閔公二

年號公敗犬戎于渭隊

隊今本作汭

服虔曰隊謂汭也杜

預曰水之隈曲曰汭王肅曰汭入也詩芮鞠之即毛

傳曰芮水涯也鄭箋曰汭之言內也據此則渭汭之

汭不得為水名矣周禮職方氏其川涇汭鄭注曰汭

在豳地易彥祥曰汭非禹貢之汭禹貢言汭皆水內

此川名是也蔡傳引詩芮鞠與職方涇汭以證禹貢

渭汭為水名殊混孔傳曰屬逮也水北曰汭言治涇

水入于渭也蔡傳易之曰屬連屬也涇水連屬渭汭

二水也皆非

漆沮既從

蔡傳曰漆水寰宇記自耀州同官縣東北界來經華  
原縣合沮水沮水自坊州昇平縣北子午嶺出俗號  
子午水下合榆谷慈馬等川遂為沮水至耀州華原  
縣合漆水至同州朝邑縣東南入渭箋按孔傳曰漆  
沮二水名亦曰洛水出馮翊北前漢匈奴傳涇洛之  
北顏師古曰此洛即漆沮水也水出上郡雕陰泰冒

山而東南入于渭延安洛記曰洛水出慶陽府環縣  
經延安府甘泉縣經鄜州宜君縣子午嶺至中部縣  
入西安府界經耀州及同官縣至富平縣合沮水歷  
蒲城同州至朝邑東南入渭寰宇記曰漆水自同官  
界來蔡傳據之不知禹貢漆沮自有二水但云自同  
官界來是洛水也一統志遂言同官之漆出自鳳翔  
不知漆水為涇汭所間其能飛渡至同官耶圖書編  
於延安洛記中辨之詳矣

蔡傳曰地志謂漆水出扶風縣西晁氏曰此豳之漆也水經漆水出扶風杜陽縣程氏曰杜陽縣今岐山普潤縣之地亦漢漆縣之境其水入渭在澧水之上與經序渭水節次不合非禹貢之漆水也箋按水經注昔韓欲令秦無東伐使水工鄭國間秦鑿涇引水謂之鄭渠渠水上承涇水於仲山西瓠口所謂瓠中也鄭渠又東逕捨車宮南絕治谷水鄭渠故瀆又東逕嵯薛山南又東絕清水又東逕北原下濁水注焉

又東逕南原中北屈逕原東與沮水合

宋白曰符堅于戡薛山北

置三原護軍以其地南有鄠原西有盩厔原北有白鹿原為三原後魏太平真君七年罷護軍置縣分

為二水一水東南出至白渠與澤泉合俗謂之漆水

又謂之為漆沮水絕白渠東逕萬年縣故城北

今咸寧縣

為櫟陽渠其水又南屈更名石川水又西南逕郭狼

城西與白渠枝渠合又南入于渭水也長安志曰漆

水經華原縣界十五里南流入沮水入富平縣界俗

名石川河據此則渭水東會于涇又東過漆沮其先

後莫此之詳悉也程氏雍錄曰雍境漆水凡四出而實三派雍州萬年縣石川河一也邠州新平縣漆水二也鳳翔府普潤縣漆水三也鄭白渠一名漆沮四也四水之中惟石川河當為禹貢漆沮而縣詩謂自土漆沮者在岐不在邠也

澧水攸同

漢書作鄠水道  
同史記作所同

蔡氏曰澧水地志作鄠出扶風鄠縣終南山今永興軍鄠縣也東至咸陽入渭箋按詩豐水東注維禹之

續集傳曰澧水東北流經豐邑之東入渭而注于河  
括地志澧水源在雍州長安縣西南山澧谷蘇氏曰  
澧渭相若故言同

荆岐既旅

蔡傳曰荆山即北條之荆地志在馮翊懷德縣南今  
耀州富平縣掘陵原也

箋

按水經注渭水之陽即懷

德縣界也城在渭水之北沙苑之南

唐志同州馮翊縣有沙苑地

理志禹貢北條荆山在南山下有荆渠夏后鑄九鼎

處也括地志荆山在雍州富平縣今名掘陵原按富平西北有定陵元陵章陵簡陵東南有豐陵世謂之為掘陵原孔傳曰荆在岐東非荊州之荊

蔡傳曰岐山地志在扶風美陽縣西北今鳳翔府岐山縣東北十里也

箋

按師古曰荆在岐東言二山治

畢已旅祭也玉海曰岐山在鳳翔府東北十里一名天柱山今按山有兩岐故名曰岐山周語曰周之興也鶯鶯鳴于岐山土人謂之鳳凰堆

終南惇物至于烏鼠

蔡傳曰終南地志古文以太一山為終南山在扶風

武功縣今永興軍萬年縣南五十里也按五經要

義曰太一山在扶風武功縣與終南山相連福地記

曰終南山北去長安城八十里終南南山之總名太

一一山之別號

終南山在西安城南澧水所出  
太一山在終南之南漓水所出

蔡傳曰惇物地志以垂山為惇物在扶風武功縣今

永興軍武功縣也按金史志乾州武亭縣有惇物

山山在今武功縣東南二百里

蔡傳曰鳥鼠地志在隴西郡首陽縣西南今渭州渭

源縣西也俗呼為青雀山

箋

按唐地志渭州渭源縣

有鳥鼠同穴山一名青雀山山在今臨洮府渭源西

二十里渭水源在縣西七十六里

原隰底績至于豬野

史記作  
都野

蔡傳曰廣平曰原下濕曰隰詩曰度其隰原即指此

也鄭氏曰其地在豳今邠州也

箋

按周禮大司徒辨

五地之物生五曰原隰遼司注遙掌畿外邦國之原  
隰如禹貢冀之太原徐之東原雍之原隰是也鄭云  
其地在豳以詩篤公劉度其原隰豳居允荒故也蔡  
云今邠州周應實識小編曰唐明皇以豳近豳改為  
邠也

蔡傳曰豬野地志武威縣東北有休屠澤古文以為  
豬野今涼州姑臧縣也箋按括地志都野澤在涼州  
姑臧縣東北二百八十里水經注曰地理志谷水出

姑臧南山北至武威入海屆此水流兩分一水北入  
休屠澤俗謂之為西海一水又東逕一百五十里世  
謂之為東海通謂之都野矣底績而云至于者兼豬  
野言魏太武伐涼謂姑臧城東西門外湧泉合于城  
北其大如河其間乃無燥地此禹所以底績為難也  
三危既宅三苗丕叙  
三危古文作三危宅史  
作度丕叙史作大序  
蔡傳曰三危即舜竄三苗之地或以為燉煌未詳其  
地三苗之竄在洪水未平之前及是三危已既可居

三苗於是大有功叙

箋

按舜典竄三苗于三危孔傳

曰三苗縉雲氏之後為諸侯號饕餮三危西裔山海

經三危之山員廣百里郭注今在燉煌郡唐地志燉

煌縣東四十里有三危山傳以為未詳其地何也蔡

舜典傳曰三苗之竄在洪水未平之前据通鑑竄三

苗在堯七十六載時禹平水土已五年矣亦不是洪

水未平之前既宅之宅當即為舜典五流有宅五宅

三居之宅不得以降丘宅土例也益稷篇禹曰外薄

四海咸建五長各迪有功苗頑弗即工帝其念哉帝  
曰臯陶方欽厥叙方施象刑惟明則是向所頑不即  
叙者至是乃丕叙矣非大有功叙之謂

蔡傳曰舜竄三苗既竄者已丕叙而居於舊都者尚  
桀驚不服蓋三苗舊都山川險阻氣習使然今湖廣  
徭洞時猶竊發俘而詢之多為苗姓豈其遺種與

箋

按水經注渭水東歷大利又東南流苗谷水注之地  
道記云有三危三苗所處故有苗谷又洛書甄耀度

曰三危山在鳥鼠之西南上為天苑星此三危在雍州之境内當是舜竄之近地而不與沙州三危同科者也故舜典分北三苗

北古別字

孔傳曰三苗幽閭君臣

善惡分北流之不令相從禹征有苗誓師曰三苗昏迷不恭君子在野小人在位韓非子曰三苗有成駒亡國之臣也則當日遠竄于瓜沙者必是輩耳周書呂刑曰皇帝哀矜庶戮之不辜遏絕苗民無世在下孔傳曰使無世位在下國也則當日仍有遺種可知

世因其頑梗不悛呼苗為猫

厥土惟黃壤

蔡傳曰黃者土之正色

箋

按易曰天玄而地黃故黃

為土之正色辛氏三秦記長安地皆黑壤何也易坤  
鑿度曰坤有八色東下西上北黑南輕中殷甘滋厥  
土厚肌東鹹西淡南汚北荒其大較也

厥田惟上上厥賦中下

孔傳曰田第一賦第六人功少

箋

按貨殖傳關中自

汧雍以東至河華膏壤沃野千里自虞夏之間以為  
上田後漢虞詡曰禹貢雍州之域厥田惟上上且沃  
野千里穀稼殷積然則雍賦第六大抵山多而田少  
非但為人功少也

厥貢惟球琳琅玕

蔡傳曰球琳美玉也琅玕石之似珠者爾雅西北方  
之美者有昆侖虛之球琳琅玕箋按玉藻曰笏天子  
以球玉注球美玉書顧命天球河圖在東序唐孔氏

曰天球雍州所貢之玉色如天爾雅球琳美玉也琳亦玉名又璆與球同蔡傳以梁州之璆為磬雍州之球為玉不知何所分也說文琅玕石似玉徐氏總龜曰琅玕生南海石厓上狀如筍質似玉荀子琅玕龍茲注云琅玕似珠可為冠冕之飾山海經槐江之山其上多藏琅玕黃金珍玩考曰琅玕樹生海底丹柯碧葉與珊瑚略同出水紅潤旋變為青擊之作金石聲

浮于積石

蔡傳曰積石地志在金城郡河關縣西南羌中今鄯

州龍支縣界也箋按孔傳曰積石山在金城西南河

所經也宋楊允恭曰自環州入積石抵靈武七日程

易氏曰河自廓州積石軍北

唐志廓州達化縣有積石軍西至青海一百餘

里東北流一百五十里至化成縣南八十步東流一

百四十里至鄯州龍支縣西南六十里

劉昫曰龍支漢伊吾縣地

積石山在縣西九十八里又三百九十里至河州枹

罕縣南五十里積石在縣西北七十里一名唐述山

水經注河北有屠山山甚靈秀每時見神人往還彼羌目鬼曰唐述因復名之為唐述山 今人目

龍支縣山為大積石此名小積石

蔡傳曰李復奏

復徽宗時人

黃河過會州入韋精山石峽

險窄自上垂流直下高數十丈船豈可過至西安州

之東

宋志西安州元符二年建

大河分為六七道散流渭之南山

逆流數十里方再合逆溜水淺灘磧不勝舟載然此

言貢賦之路亦曰浮于積石至于龍門西河則古來

此處河道固通舟楫矣而復之言乃如此何也箋按

宋史徐興傳太宗詔督轉靈武芻糧道積石漢溝洫  
志關中有漳渠引諸川溉田如淳曰水出韋谷即韋  
精也復說非

至于龍門西河

蔡傳曰龍門山地志在馮翊夏陽縣今河中府龍門  
縣也西河冀之西河也箋按漢馮翊今西安府同州

也龍門山在同州韓城縣東北八十里宋河中府本

漢河東郡今山西平陽府也其龍門縣乃今蒲州河  
津縣夏陽今韓城不得以夏陽之龍門山指為龍門  
縣也史淮陰傳涉西河正義曰即同州龍河從夏陽  
渡者是也

### 會于渭汭

蔡傳曰雍之貢道有二其東北境則自積石至于西  
河其西南境則會于渭汭言渭汭不言河者蒙梁州  
之文也箋按積石在今河州衛為古西羌地乃雍州

西境也積石又在其西至龍門西河則雍之東境其  
東北貢道自當徑自入河何煩轉從積石傳以為東  
北自積石誤經明言至于西河以為不言河者蒙梁  
州之文亦誤

織皮崑崙析支渠搜

蔡傳曰三國皆貢皮衣故以織皮冠之崑崙即河源  
所出在臨羌箋按孔傳曰織皮毛布今按晉載記有  
氂罽唐志有交梭彌牟布元史有青速夫皆所謂毛

布也吳氏曰織皮獸皮熟之去毛削令至薄裁令極細如縷以金傳之織而為布若皮衣何用織為又按漢地志金城臨羌縣有昆侖山祠燉煌廣至縣治昆侖障皆即今肅州之昆侖也竹書紀年穆王十七年西征于昆侖丘見西王母穆天子傳至宗周至昆侖合八千一百里後漢書竇固出燉煌擊昆侖塞注昆侖山名因以為塞在今酒泉縣西南是也此為小昆侖蔡傳云河源所出非也爾雅河出昆侖虛括地志

昆侖山在雍州西南一萬五千三百七十里今在土  
番朶甘思西鄙世謂之大昆侖也

蔡傳曰析支在河關西千餘里箋按司馬彪曰西羌

者自析支以西濱于河首在右居也河水屈而東北  
流逕于析支之地是為河曲矣馬伯循曰寧夏東北  
河水遇山析為二枝處有析支城大戴禮鮮支渠搜  
後漢西羌傳濱于賜支鄒歸軒以為即析支也

蔡傳曰渠搜水經曰河自朔方東轉逕渠搜縣故城

北盖近朔方之地也

箋

按臣瓚曰孔子三朝記云北

發渠搜南撫交趾此渠搜在朔方禹貢渠搜在雍州  
西周書王會解渠搜以鮑犬隋書西域傳撥汗國都  
葱嶺之西五百餘里古渠搜國也東去疏勒千里去  
瓜州五千五百里蔡傳据水經以為渠搜近朔方非  
也

### 西戎即叙

蔡傳曰皆西方戎落故以西戎總之

箋

按王制曰西

方曰戎被髮衣皮有不粒食者矣杜氏通典曰西戎  
出自三苗盖羌姓也今按舜竄三苗去禹未遠而禹  
貢作于堯時已云西戎即叙豈有出自三苗並為羌  
姓之理山海經苗民釐姓顓頊後其非羌姓可知孔  
安國以析支昆侖渠搜西戎為四國据殷時伊尹四  
方獻令正西昆侖狗國鬼親枳已闢耳貫胸雕題離  
丘漆齒史記匈奴傳夏道衰公劉失其稷官變于西  
戎邑于豳竹書殷太戊十六年西戎來賓王使王孟

聘西戎則西戎甚衆不得以一國盡之鄭氏以衣皮  
之人居昆侖析支渠搜三山皆在西戎蔡傳因之故  
謂以西戎總之

禹貢會箋卷九

欽定四庫全書

禹貢會箋卷十

翰林院檢討徐文靖撰

禹貢下

導岍及岐至于荆山

岍史漢作汧

蔡傳曰岍山地志扶風汧縣西吳山古文以為汧山

今隴州吳山縣吳嶽山也

箋

按郡國志扶風汧縣有

吳嶽山本名汧汧水出郭璞曰別名吳山周禮所謂

嶽山者

周職方雍州其山鎮曰嶽山注吳嶽也

前漢食貨志嶽山岐山

吳山師古曰吳岳非一山之名今隴州有岍山汧水

出其西而東入渭又有吳岳不得以岍即吳山也水

經汧水出汧縣弦蒲谷鄉弦中谷為弦蒲數水有二

源一水出縣西山世謂之小隴山一水發南山西側

俗以此為吳山則是非一山也蔡傳荆岐見雍州

箋

按孔氏曰荆在岐東非荊州之荆也地理志扶風美

陽縣禹貢岐山在西北中水鄉馮翊懷德縣禹貢北

條荆山在南元和志荆山在富平縣西南二十里

逾于河

蔡傳曰逾者禹自荆山而過于河也孔氏以為荆山之脈逾河而為壺口雷首者非是

箋

按括地志荆山

在雍州富平縣其山東距河二百餘里何相去二百餘里而豫書之曰禹于此逾于河也且逾河必書八年于外可勝書哉史記天官書中國山川東北流其維首在隴蜀考工記曰凡天下之地勢兩山之間必

有川焉凡溝逆地防謂之不行鄭氏曰地防地脈也  
管子曰水者地之血氣筋脈之流通者呂氏春秋曰  
禹周行寓內脈地理名金石蘇氏曰地之有山猶人  
之有脈有近而不相屬者有遠而相連者雖江河不  
能絕也孔氏地脈之說正未可廢也

壺口雷首至于太岳

雷首即  
首陽山

蔡傳曰壺口太岳見冀州雷首地志在河東郡蒲坂  
縣南今河中府河東縣也箋按隋圖經曰平山在平

陽一名壺口山今名姑射山考平山在平陽府城西  
南二十五里姑射山在府西五十里非一山也太岳  
即霍山今在平陽府霍州上有一峯名太岳雷首水  
經注曰山臨大河去蒲坂三十里俗亦謂之堯山竹  
書帝堯五十年遊于首山即是山也其陽有雷水出  
焉故曰雷首

底柱析城至于王屋

底柱史記  
作砥柱

蔡傳曰底柱析城王屋皆冀州山底柱石在大河中

流其形如柱今陝州陝縣三門山是也箋按水經注

底柱在大陽縣東山有三門故亦謂之三門山南曰鬼門

中曰神門北曰人門禹所鑿以通河也自底柱以下五戶已上

五戶灘名也其間一百二十里合有一十九灘水流迅急

勢同三峽

蔡傳曰析城地志在河東郡獲澤縣西今澤州陽城

縣也晁氏曰山峯四面如城箋按括地志析城山在

獲澤縣西南七十里山有二水東西流故名析城也

析城在王屋北下有神池其深莫測世傳與濟瀆相通

蔡傳曰王屋地志在河東郡垣縣東北今絳州垣曲

縣也晁氏曰山狀如屋

箋

按山海經王屋之山潞水

出焉即沅水也古今地名云王屋山方七百里本冀

州之河陽山元和志山在王屋縣北五里週一百三

十里高三十里孔傳曰三山在冀州之南河之北

太行恒山至于碣石入于海

蔡傳曰太行恒山皆冀州山太行地志在河內郡山

陽縣西北今懷州河內也箋按河圖括地志象太行

天下之脊管子曰其山北臨代南俯趙東接河海之

間山海經太行之山其首曰歸山列子作太形山郭

緣生述征記太行首始河內自河內至幽州凡有八

陁蔡傳以覃懷屬冀故以懷州河內之山為冀州山

也

蔡傳曰恒山地志在常山郡上曲陽西北今定州曲

陽縣也

箋

按隋地志恒陽縣有恒山本漢曲陽縣隋

改恒陽恒山在縣北百四十里恒水所出孔安國曰  
此二山連延東北接碣石而入于滄海一統志碣石  
山在今永平府昌黎縣西北離海三十里

蔡傳曰王鄭有三條四列之名皆為未當今據導字  
分之以為南北二條而江河以為之紀於二之中又  
分為二焉

箋

按馬融以岍為北條西傾為中條嶓冢

為南條班史地志有南條荆山北條荆山張昶華嶽

碑序布五方則處其西列三條則居其中三條之說自古有之非王肅始也鄭玄以岍為陰列西傾次陰列嶠冢次陽列岷山正陽列蓋岍岐之列河濟所經西傾之列伊淮渭所經皆在北條為陰嶠冢之列漢水所經岷山之列江水所經皆在南條為陽日記曰蔡傳本導字分之為南北二條本唐天文志天下山河之象存乎兩戒按唐志云北戒自三危積石負終南地絡之陰南戒自岷山嶠冢負地絡之陽是即陽

列陰列之謂也

史記朝鮮之拔星弗于河戒韓楊天文要集曰兩戒間為天關門荊州占

作界音義同也

西傾朱圉鳥鼠至于太華

國一作圖

蔡傳曰雍州山也西傾見梁州朱圉地志在天水郡

冀縣南今秦州大潭縣也俗呼為白巖山

箋

按括地

志西傾今嶺臺山沙州記曰洮水出郡國志漢陽郡

冀縣有朱圉山史記秦穆公伐冀戎即此蔡傳謂雍

州山而西傾見梁州者徐士彰曰西傾在雍之西南

近西夷之地是西傾之南際梁州也水經注午谷水南入渭水南有長塹谷水次東有安蒲溪水次東有衣谷水並南出朱圉山山在梧中聚開山圖曰朱圉山謂之天鼓山今伏羌縣西南有朱圉山又有石鼓山殆非一山蔡傳以冀縣即大潭縣按大潭故城在今西和縣之西南三百里本漢隴西西縣地不得為天水之冀縣也

蔡傳曰烏鼠見雍州太華地志在京兆華陰縣南今

華州華陰縣二十里也

箋

按地說曰鳥鼠山同穴之

枝幹也鄭氏曰鳥鼠之山有鳥馬與鼠飛行而處之  
又止於同穴之山馬以導渭言鳥鼠同穴導山但言  
鳥鼠分為二山其實只一山而但言鳥鼠者省文也  
史記封禪書西岳華山正義曰山在華陰縣南八里  
古文以為敦物据漢志垂山本敦物正義誤垂為華  
水經注曰華山古文之敦物則誤已始於道元矣唐  
天文志曰河源自北紀之首循雍州北徼達華陰而

與地絡相會江源自南紀之首循梁州南徼達華陽而與地絡相會皆謂此山也

熊耳外方桐柏至于陪尾

陪尾史記作負尾从力从貝音陪今皆讀為負尾誤

蔡傳曰豫州山也熊耳在商州上洛縣詳見豫州

箋

按一統志熊耳山在西安府商縣西五十里伊水所出亦雍州山蔡以為豫州熊耳則在今河南陝州盧氏縣也熊耳一山界兩省綿亘二百餘里首尾界雍豫二境以商州之熊耳為豫州非矣蔡傳以陪尾即

安陸之橫尾在今德安府安陸城東亦荊州境以為豫州亦非矣

蔡傳曰外方地志潁川郡密高縣有密高山古文以為外方在今西京登封縣也

箋

按詩陳風譜云其封

域在禹貢豫州之東西望外方檜羔裘傳云其封域在古豫州外方之北滎波之南孔氏曰案地理志外方即密高山也後世以外方高大謂之嵩高升為中嶽詩大雅崧高維嶽爾雅嵩高為中嶽郭璞曰太室

山也中嶽名始見此堯典咨四岳尚書大傳舜巡狩  
四岳元祀岱泰山中祀大交霍山秋祀柳穀華山冬  
祀幽都弘山昭四年左傳司馬侯謂晉侯曰四嶽三  
塗陽城太室荆山中南九州之險也言四嶽而太室  
不與無所謂中嶽也然則禹貢時以嵩高為外方無  
可疑也金氏曰舊以嵩高為外方非是嵩高世名中  
嶽安得與江夏內方相為內外據唐志陸渾山一名  
方山云在伊闕今案水經注焦澗水西出鹿臯山東

流逕孤山南其山介立豐上單秀孤峙世謂之方山東  
歷伏睹嶺南東流注于伊伊水又東北涓水注之水  
出陸渾西山即陸渾都也然則是孤山一名方山  
非陸渾也

蔡傳曰桐柏地志在南陽郡平氏縣東南今唐州桐  
柏也箋按水經注澧水源出桐柏山與淮同源而別  
流西注故亦謂水為沅水山海經淮出餘山在朝陽  
東義鄉西元和志云唐州桐柏縣本漢平氏縣東界

梁置義鄉縣蓋本山海經以立名也蔡傳曰陪尾地志江夏郡安陸縣東北有橫尾山古文以為陪尾今安州安陸也

箋

按陪尾有三水經洛水注曰地記云

洛水東北過五零陪尾北與澗渥合此陪尾蓋水名也唐志武德三年以密縣置密州并置零水縣是五零在密也一在今德安府城東北六十里俗謂之橫尾澗水所出傳謂安陸縣東北山也一在今兗州府泗水縣東十五里泗水所出唐志泗水縣有陪尾山泗

水出焉禹貢導淮自桐柏東會于泗沂則當是泗州之陪尾也陪尾史記索隱謂即地志之橫尾蔡傳據之而誤

導嶓冢至于荆山

蔡傳曰嶓冢即梁之嶓也山形如冢故謂之嶓冢

箋

按唐六典山南道名山曰嶓冢嶓冢縣故城在今漢中府沔縣西南四十里西南接寧羌州界州北九十里嶓冢山正義曰後魏地形志華陽郡嶓冢縣有

嶓冢山漢水出焉經言嶓冢既藝在梁州故傳曰即梁州之嶓也嶓冢縣故城在今漢中府沔縣西南故傳曰始出為漾東南流為沔

蔡傳曰荆山南條荆山在南郡臨沮縣北今襄陽府南漳縣也箋按山海經荆山漳水出焉而東南流注

于睢郭注曰地理志南條荆山在臨沮縣之東北漳水所出東至江陵入楊水非也今漳水於當陽縣之東一百餘里而右會沮水括地志沮水即漢水也孫

叔敖激沮水為雲夢澤即此也

按臨沮荆山即  
卞和抱璞處也

內方至于大別

蔡傳曰內方地志章山古文以為內方山在江夏郡

竟陵縣東北今荆門軍長林縣也

箋

按郡國志江夏

竟陵有立章山本內方山劉昭引荆州記曰山高三

十丈周迴百餘里然漢竟陵縣即今沔陽州景陵縣

也疑義曰景陵原無此山据水經沔水自荆城東南

流逕當陽縣之章山東注曰禹貢所謂內方至于大

別者也唐志江陵府有長林縣武德四年于東境置  
基州并置章山縣蓋以此也一統志內方山在荊門  
州南一百八十里漢江之上

蔡傳曰左傳吳與楚戰濟漢而陳自小別至于大別  
蓋近漢之山今漢陽軍漢陽縣北大別山是也水經

云在安豐者非是

箋

按地理志六安國安豐縣禹貢

大別山在西南杜預解春秋云大別闕不知何處或  
曰大別在安豐西南左傳吳既與楚夾漢自小別至

于大別然則二別近漢之名無緣得在安豐也海內  
東經大江出岷山郭璞注曰今江出岷山郡東南經  
江夏安豐至廬江南界是又以大別在安豐而誤也  
今大別在漢陽府城東北百步西有小別山又名甌  
山元和志大別山一名魯山水經江水東逕魯山南  
注曰右翼際山也地說曰漢與江合于衡北翼際山  
傍者也山左即沔水口矣南史齊張沖傳東昏勅房  
僧寄守魯山沖結盟分部拒守援魯山岸立城壘即

大別山也

岷山之陽至于衡山

岷史記作汶漢書作嶠

蔡傳曰岷山見梁州衡山南嶽也地志在長沙國湘

南縣今潭州衡山縣也

箋

按四川志岷山在茂州之

列鷺村一名鴻濛為隴山之南首江水所出也唐地

志曰岷山直上六十里日記曰岷山一帶南出為大

渡之源又包青衣以東馬湖江黔江諸源東出一支

為衡山張揖廣雅曰衡山南岳有岨嶠峯上有神禹

碑王制曰自江至于衡山千里而遙孔傳衡山江所經其誤甚矣

過九江至于敷淺原

蔡傳曰九江見荊州

箋

按禹貢九江秦因之立九江

郡漢改豫章尋陽縣屬焉郡國志尋陽縣南有九江是也縣本在江北晉以江北之尋陽并柴桑而立郡溫嶠又徙治江南故江南得有尋陽之名至梁又改為江州以尋陽本九江之舊地故也

蔡傳曰敷淺原地志豫章郡歷陵縣南有博陽山古文以為敷淺原今江州德安縣博陽山也晁氏以為在鄱陽非是箋按孔傳曰敷淺原一名博陽山在揚

州豫章界杜佑通典曰蒲塘驛漢歷陵縣有敷淺原今縣南三十里有陽居山舊經依班固以敷淺名博陽山黃子鴻曰漢志豫章郡領歷陵縣晉志歷陵縣與餘汗鄡陽俱割屬鄱陽郡而柴桑則屬武昌郡不應歷陵出柴桑之西也因謂晁氏在鄱陽者為是且

云吳志有石印山即今饒州府之鄱陽山亦歷陵在  
鄱陽之證也一統志以崇陽縣西雲溪山為敷淺原  
非是

蔡傳曰晁氏以鄱陽有博陽山又有歷陵山為應地  
志歷陵縣之名然鄱陽漢舊縣地不應又為歷陵縣  
山名偶同未足據也江州德安雖為近之然所謂敷  
淺原者其山甚小而卑亦未見其為在所表見者惟  
廬阜在大江彭蠡之交最高且大宜所當紀志者而

皆無考據恐山川之名古今或異而傳者未必得其真也箋按郡國志鄱陽有鄱水歷陵有傅陽山二縣並屬豫章則歷陵山之在豫章者即漢以歷陵名縣者也後以鄱陽屬饒州歷陵屬江州始覺分耳又爾雅高平曰原惟其甚小而卑故以敷淺原目之水經敷淺原地在豫章歷陵縣西言地不言山者即敷陽山之原也原又在廬山西南故孫放廬山賦曰尋陽郡南有廬山九江之鎮也臨彭蠡之澤接平敞之原

原蓋即敷淺矣若廬山甚高且大山圖曰四方周四  
百餘里疊郭之巖萬仞其與廣平曰原者詎有當乎  
程氏日記曰廬山雖高而其中原田連亘人民奠居  
故有敷淺原之名後世匡谷結廬居之遂名廬阜水  
經注曰山海創志大禹海內東經曰廬江出三天子  
都入江彭澤西是則廬江之名明不自匡俗始

日記作匡

谷豫章志及道遠廬山記皆作匡俗

正是好事君子強引此類耳然則

夏禹時已有廬江自應有廬山之名何禹貢別名敷

淺原也

蔡傳曰過經過也與導沂逾于河之義同孔氏以為衡山之脈連延而為敷淺原者非是蓋岷山之脈其北一支為衡山而盡于洞庭之西其南一支度桂嶺北經袁筠之地至德安所謂敷淺原者二支之間湘水間斷衡山在湘水西南敷淺原在湘水東北其非衡山之脈連延過九江而為敷淺原者明甚淺按朱子曰岷山夾江兩岸而行其東出一支為衡山蓋岷

山在西蜀故也蔡傳以為北誤矣又按水經注湘水  
又北逕衡山縣東山在西南丹水湧其左醴泉流其  
右衡山東南二面臨映湘川又南岳記及荊州記云  
衡山周旋數百里東南臨映湘川據此則衡山東南  
二面並臨湘川是衡山在湘水西北矣酈注山在西  
南者乃謂衡山縣之西南耳傳以衡山在湘水西南  
誤矣且所謂南北二支又何嘗非地脈之說也

禹貢會箋卷十